

1292-1292- OFP - Acta Capitulum Generalium Rome Celebrati

In nomine patris et filii et spiritus sancti. Amen.

Acta capituli generalis Rome celebrati
anno Domini · M° · CC° · XCII° ·

Confirmamus has constitutiones. In capitulo de gravi culpa. ubi dicitur. quod si accusatus negaverit. etc. deleatur totum usque ibi. ne autem vicia occultentur. etc. et dicatur sic. quod si accusatus negaverit. et accusans in probacione defecerit; accusans pena accusato debita puniatur. Et hec habet · iii · capitula.

Item hanc. In capitulo De itinerantibus. ubi dicitur in fine. nisi per magistrum ordinis vel diffinitores generalis capituli. addatur. si vero conversus fuerit; ipso facto voce. nisi in sui accusatione propria sit privatus. et ubique novissimum locum teneat. nisi per magistrum ordinis vel diffinitores capituli generalis; fuerit restitutus. et nichilominus faciat penitentiam gravis culpe. Et hec habet · iii · capitula.

Iste sunt approbaciones.

Approbamus hanc. In capitulo de studentibus. ubi dicitur. quinque autem. provincie deleatur totum usque ibi. Provincia. et dicatur sic. · vi · autem provincie scilicet. Hyspania. Provincia. Lombardia. etc. Et hec habet · ii · capitula.

Iste sunt admoniciones.

Admonemus et iniungimus. quod nullus frater ponat sigillum suum in aliqua litera; nisi prius eam prior audierit et viderit diligenter.

Item. Admonemus et iniungimus prioribus provincialibus et conventualibus. in quorum provinciis sunt studia generalia. ut studentes provinciarum humane et caritative tractent. prout decet. et qui presunt in studiis. eos promoveant secundum eorum merita pace et equitate servata.

Item. Cum capitulum generale apud Ferrariam celebratum¹ inhibeat. ne aliquis frater qui non sit de corpore capituli veniat ad capitulum generale sine licencia magistri ordinis. vel ad provinciale sine licencia prioris provincialis. et ordinaverit. quod qui contrafecerit. sit per duos annos omni voce privatus; volumus et ordinamus. quod in eandem penam incidant. qui de suis conventibus recedentes. viam ad capitulum arripuerint. sine licencia speciali.

Item. Omnes licencias generales et speciales et exempciones et privilegia concessa fratribus singularibus. vel sororibus nostris a quibuscumque prelati ordinis nostri; penitus revocamus.

Cum ex commissione facta dominis nostris cardinalibus. et appellacione contra eam facta et prosecucione indiscreta. multa fuerit per ordinem turbacio subsecuta; notum facimus universis. quod ex hiis que certitudinaliter novimus et tenemus pro firmo. domini cardinales nostri ordinis. sancta et sana intencione et pro ordinis promocione et status eiusdem reparacione; dictam commissionem sibi factam acceptarunt. et ideo districtius inhibemus. ne aliquis occasione predicta linguam suam contra prefatos dominos et patronos laxare presumat. quin potius ardentius et instancius in suis sanctis et fervidis oracionibus eos habeant commendatos; precipue cum devocio eorum et affectio ad ordinem continue augeantur. si quis vero contrarium facere deprehensus fuerit; per eorum prelatos severius puniatur¹.

Iste sunt penitencie.

Iniungimus omnibus fratribus de Hyspania. qui contra ordinacionem capituli generalis priorem provincialem reelegerunt; tres dies in pane et aqua.

Item. Iniungimus omnibus fratribus de Brundisino. qui vocem in electione socii prioris ad provinciale capitulum habuerunt. nec socium elegerunt. et in scrutiniis excesserunt ultra modum debitum; omni septimana per annum. quando capitulum fuerit. unam recipiant disciplinam. et · vii · psalmos cum letania dicant.

Committimus fratri G. de Sancto Setano. ut ipse inquiret diligenter de culpa quondam subprioris Narbonensis. et aliorum in conventu eodem. qui irreverenciam non modicam. iniurias et impropria intulerunt diffinitori Romane provincie redeunti de capitulo. ut nobis relatum est. et secundum exigenciam culparum; puniat prout debet. absolvendo et ad alios conventus. si necesse fuerit. deputando.

Concedimus provincie Francie · i · domum. Provincie Lombardie; · i · ponendam in Parigia². Provincie Romane; · i · ponendam in Summa. Provincie Polonie; unam. Dictas autem domos concedimus ponendas absque preiudicio provincie cuiuscumque.

Absolvimus priores provinciales Hyspanie et Provincie.

Conventuales Fulginacensem etc. et ordinamus. quod iidem fratres in eisdem provinciis et conventibus ad eadem officia non assumantur hoc anno.

Ista sunt suffragia pro vivis.

Pro venerabili collegio cardinalium. et pro instanti electione apostolica; quilibet sacerdos · ii · missas³.

Ista sunt suffragia pro defunctis.

¹ Argumentum. quod agitur. depositionis fr. Munionis de Zamorra fusiori stilo tractabitur in prolegomenis; interim adeas SSOP I, 398 sqq.

² Parigia: corruptum sine dubio pro Yporegia.

³ Mortuo Nicolao IV. april. 4. 1292 sedes apostolica vacat ad iul. 5. 1294, quo die eligitur Coelestinus V.

Pro domino papa Nycholao · iiiio · quilibet sacerdos · iiiior · missas etc.

Item. Noverint universi. quod socius diffinitoris Polonie rediens de capitulo anno preterito. obiit Parisius. et diffinitor Anglie. antequam ad suum rediret conventum. obiit in provincia Anglie.

Pro qualibet missa; clericus · vii · psalmos cum letania. conversus · c · pater noster et totidem ave Maria dicant.

Summa pro vivis missarum · xlviii · summa pro mortuis; · xix ·

Letania in ferialibus diebus more solito dicatur.

Committimus magistro ordinis ordinationem studii Parisiensis. et aliorum studiorum generalium. ut ipse de magistris et bacallariis ordinet et disponat. prout utilitati ordinis et profectui viderit expedire.

Rogamus. et quantum in nobis est. committimus magistro ordinis. quod ipse disponat et ordinet de provincia Terre sancte; prout ei melius videbitur expedire.

Item. Volumus et iniungimus. ut diffinitores presentis et futuri anni. in veniendo et redeundo. deducantur de conventu ad conventum. et provideatur eis secundum morem ordinis. prout hactenus est servatum.

Capitulum generale sequens assignamus in conventu Insulensi. in provincia Francie.

Sentencias iudicum approbamus.

Actis additae sunt litterae magistri ordinis; cf. app. n. XLVII.